

# 瑜伽師地論

科句披尋記

## 彙編

卷一 (續)

彌勒菩薩說唐三藏沙門玄奘奉詔譯

韓清淨科記 三時學會彙編

### 卯二第二義三

辰一顯色

又顯色者，謂若色顯了，眼識所行。

若色顯了眼識所行者：此釋顯色得名所以。謂青黃赤白乃至空一顯色，彼彼體性隨一現前，有大威勢，映蔽餘色令不顯現；唯自所現，能生眼識成所行性。是故名爲眼識所行。

辰二形色

形色者，謂若色積集長短等分別相。

若色積集長短等分別相者：此釋形色得名所以。積集而有，唯假非實，是故說言是分別相。

辰三表色

表色者，謂即此積集色，生滅相續，由變異因，於先生處不復重生，轉於異處或無間，或有間，或近，或遠，差別生。或即於此處變異生。是名表色。

即此積集色生滅相續等者：此釋表色得名所以。然此表色，唯約身業爲論，有見攝故。色身形相有長短等種種差別，名積集色。由業異熟剎那流轉；生滅滅生，無間無斷，是名生滅相續。由造作思變異爲先，於彼後時身變異轉。是故此說由變異因。身變異時，有其方所現差別。或轉趣餘方，或住此方處，隨心示現取捨屈伸行住坐臥等相。此示現相，於其方所或無間或有間或近或遠非一類起；名變異生。如是變異，以思爲因；能表示思故名表色。

### 卯三第三義三

辰一顯色

又顯色者，謂光明等差別。

謂光明等差別者：此中差別，唯說光明及與影闇雲煙塵霧及空一顯色；故置等言。不說青黃赤白。以此四種，是色自相；餘光明等是自相中所有差別故。唯顯差別，是此所說，是故畧無青黃赤白。

辰二形色

形色者，謂長短等積集差別。

辰三表色

表色者，謂業用爲依轉動差別。

業用爲依轉動差別者：前說由變異因，即此業用爲依？前說取捨屈伸行住坐臥等，即此轉動差別。

寅二釋異名

如是一切顯形表色，是眼所行，眼境界，眼識所行，眼識境界，眼識所緣，意識所行，意識境界，意識所緣，名之差別。

是眼所行眼境界等者：謂一切色若正現前，名眼所行。如是眼識所行，意識所行，當知亦爾。此所行性，畧有六種：一、由所依處故；二、由自性故；三、由方故；四、由時故；五、由顯了不顯了故；六、由全分或一分故。如下決擇分釋。（陵本五十四卷二十二頁）若一切色或正現前，或已現前，或當現前，名眼境界。如是眼識境界，意識境界，當知亦爾。爲所領取，名彼境界。若一切色正現在前，能生眼識成所了別，是名眼

識所緣。如是意識所緣，當知亦爾。然已現前當現前色，亦爲意識所緣，與眼識別。其義應知。

### 子二好惡等三

又卽此色，復有三種：謂若好顯色，若惡顯色，若俱異顯色，似色顯現。

若好顯色等者：此中三種好惡俱異，唯說顯色，不說形表。當知形表，依顯色有；非離顯色別有形表。攝舉所依，畧不具說。非由不說謂彼爲無，如集論中亦說三種。謂妙不妙俱相違色，更無分別，唯顯色故。復次好惡等色，非實有性；唯是心偏計所起。由是說言似色顯現。此約意識所緣，說有三種差別；不通所餘眼所行等。

### 辛四助伴三

#### 壬一出體

彼助伴者：謂彼俱有相應諸心所有法。所謂作意、觸、受、想、思，及餘眼識俱有相應諸心所有法。

謂彼俱有相應諸心所有法等者：謂彼眼識與諸心所有法俱流時轉，同生住滅，於一所作更互相應；是名俱有相應。卽由此義，心所有法得助伴名。心所有法，衆多非一。所謂多意觸受思想，此五名爲偏行心法。諸識生時徧俱起故。復有所餘不徧行法，隨其所應與彼眼識俱有相應，說名爲餘。

### 壬二辨相

又彼諸法，同一所緣，非一行相，俱有相應一一而轉。

又彼諸法同一所緣等者：此說同行相應。謂心心所於一所緣展轉同行故。此同行相應，復有多義。謂他性相應，非己性；不相違相應，非相違；同時相應，非異時；同分界地相應，非異分界地。（如集論三卷九頁說）如心心所相應道理，如是諸心所法更互相應，當知亦爾。由同分界地相應非異分界地故，說彼諸法同一所緣。然於一所緣境，有其種種行相差別而轉；由是復說非一行相。由同時相應非異時故，說彼諸法俱有而轉。由不相違相應非相違故，說彼諸法相應而轉。由他性相應非己性故，說彼諸法一一而轉。

### 壬三釋因

又彼一切、各各從自種子而生。

又彼一切各各從自種子而生者：如說眼識以阿賴耶識爲自種子依，如是諸心所法，當知亦爾。爲顯此義說彼一切從自種子。又彼諸法一一而轉，當知自種各各差別。

### 辛五作業二

#### 壬一畧標

彼作業者：當知有六種。

彼作業者當知有六種者：眼識作業、有三差別。一、了別業。此開爲四。二、隨轉業。此攝有三。三、取果業。依此差別，或開或合，故成六種。

### 壬二別列二

#### 癸一初四了別業攝二

##### 子一初業

謂唯了別自境所緣，是名初業。

唯了別自境所緣者：如說一切顯形表色亦是眼識境界。眼識所緣名之差別，除意識外不共餘識；是名自境所緣。此了別業，不同意識徧緣一切自他境界；故置唯言。

##### 子二餘業

唯了別自相。唯了別現在。唯一剎那了別。

唯了別自相等者：如彼意識、了別自相無相；眼識不爾、唯了別自相。又彼意識、了別去來今世、眼識不爾，唯了別現在。又彼意識剎那了別，或相續了別；眼識不爾，唯一剎那了別。非五識身有二剎那相隨俱生義故。如下意地釋。（陵本三卷六頁）

### 癸二後二隨轉業攝二

#### 子一標

復有二業。

#### 子二列二

##### 丑一隨轉業

謂隨意識轉，隨善染轉，隨發業轉。